

Christian Meivah

March - April, 2017

Lhani seh thuso

Private Circulation

Thumvei seilep jou ahkhon

Matthew 26:31-75 a ahcha khon ding thu kisei hi anasai. Peter din thumvei Jesu aseilep jouva ahcha akhon in alung asuboi tai. Peter hi hipatep inlang, nachunga jong hiti hin ahcha'n nakhon den leh thohlel lleh in nate.

1) *Ah-khonin Peter asuhgim* : In dan chungnunga Jesu le seijui ho a umkhom pet un, Jesun "Tujan teng kachunga nakisuhmo sohhelel diu ahi" (Mat. 26:31) anati. Hia 'nakisuhmo' kiti hin 'nakipal' diu ahiloule 'eidalhaa napan diu' atina ahi. Jesu thusei chu Peter in anasang joupon, 'mi dangin nadalhah soh hel jonglele ken vang dalha hih hel inge' tin Jesu adon but jenge. Jesun, thumvei nei seilep teng ahcha'n nahin khonden jeng ding ahi, tin ana donbut-e (Mt. 26: 31-35).

Peter in ahkhon theina din kalsan thum ananei-e. Amasa pen chu, Jesu thusei atahsan lou chu ahi. "Nang to thitha ding hijong leng naseilep hih helinge" (chang 35) tin Jesu ana donbut tai. Paul in "Koi hi leh adinga kigel-an, alhuh louna din ching thei hen" tin jong ana sei khan ahi (1 Cor. 10:12). Peter lhahsamna anina chu, aman Jesu nung ajui vang

in, akichat jeh in, gamla thim tah in ana jui tan ahi (chang 56-57). Jesu nung jui-a kigela ameisan chu dihluu ahi. Athumna chu, thumvei Jesu ka he khapoi, tia aseilep chu ahi (Mt. 26:70-74). Thumvei aseilep jouvin, ah ahung khongpai tai. Luke sut dan in, thumvei aseilep-a ahkhon jou chun, "Pakai kihei-a Peter agah vet leh, 'tunia ahkhon masanga thum vei neisei lep ding ahi' tia Pakai in aseilep peh masah chu Peter in ageldoh tai. Hijeh chun apotdoh in lhase tah in akap tai" (Lk.22:61-62) ati.

Jesu chungah hiti thilsoh aso lai hin, Jesun Peter lunggimna ho chu anahei. Peter in Jesu thumvei aseilep jou chun ahung khanglap in, akisih in, ahinla ageisang val tan, polama ana kap tai.

2. *Nang le kei chungah ahcha khong kha tam ?* Leiset hinkho a iboilai hin, abang komle Jesu ana ki sumil jie. Mi igin jeh ham, eima dei khat bolchaina ding ham in, Jesu thu ana kidonda khajie. Hitengle chun Jesu seilep akihitai. Hijeh hin tukal ahcha akhon tengle thil thum geldoh leu hen apha. Khatna chu, kikhol tohna phat, ahi. "Peter in agel doh

tan, polama apotdoh loi-in lhase tah in akap tai" (Mt.26:75). Kigel phat kit-a kisih loi-a, Pathen koma ngai dam kithum ngai ahi. Anina chu, kile heina phat nei angai-e. Peter chu, "Polama apotdoh loi in, lhase tah in akaptai" (Mt.26:75) akiti. Hia hin hinkho kile heina apange (2 Cor. 7: 10). Hichu lunggel dan khel-heina ahi. Tulai christian ten jong Jesu dei lou khat ibol tengule kilehei-a Jesu henga ngaidam thuma, kistem thah ngai ahi. Athumna chu, athah hina hi ahi. Khonung sangin Jesun Peter koma, "John chapa Simon, hiche ho sanga hi nei ngailut joh hinam?" tin ana donge (John 21:15-17).

Peter din, ahkhon chu akile hei theilouna ahipoi. Ahkhon ogin chun asulip in, akile hei in Jesu abel kit in ahi. Eiho hinkhoa jong Jesu deilou ibol itoh isei khah ule Jesu da lhah pai pai sanga Jesu kihol doh kit ngai ahi. Vannoi leiset a ichen lai un, lhezna tampin eitom jingui. Hiho lah-a hinkho iman lai un Jesu phaten hol ute. Ijem tia hetlou kah-a, Jesu deilou bolkhia ium uleh lung heiloi-a Jesu bela ngaidam kithuma bolkit louhel ding ahi (Rom. 3:23). Bolkel tohkel khattou jeh-a Jesu dalhah pai-pai vang eima man na ding ahi (1 John 1:9). Satan in na nung ajui jingin, nahenga thil nia lhez lah tei nagoi. Khat chu, "Kino hih in" kiti hi ahin, anina chu, "Agei val tai" tihi ahi. Olin Jesu tahsan nan nate kiti hile kisihna ding phat agei val tai tihi, satanin eilheznau thucheng teni ahi.

Jesu mat-a aum thu

Ichunga mi alung lhah ding ideicheh ui. I-insung miho deh in ei ngailu leh iti jiuve. Jesu chu aman ahung lhatdam nom hon ana deilou u ahikhai (Mt. 27:11). Adei lou jeh un, Governor hia Pilate in athi teina ding thulhuhna aneina din ana ngeh tauve. Rome te danthu dung jui-a Judah (Jew) hon Jesu atha thei lou u anahi. Vannoi pumpi Pathen hia Jesu chu aman angailut Judah ten adeimo-u ahi. Hiti chun Israelte lengpa chu ling lukhuh akhuh peh un, laltounaa tousah sangin cross joh a ana khailih tauve (Isa.53:3).

Thusima hin Jesu chu Pilate anga athu ana kitane, atinan ahinla Pilate thu joh Jesu anga kitan anahi. Pilate in Jesu huhdoh tei anagoi, ahin la Pilate chu ahangsan pon, ahuhdoh jou tapoi. Pilate in alungdon manin, "Messiah kiti Jesu hi iba kalo ding hitam?" anati hi, tulai eiho Adam cha te hon jong iseidoth uva phatah ahi (Mt. 27:22). Pilate in thudih a Jesu thu tan tei-a chule Judahte lunglhai sah anagon ahi. Akidoi tapoi. Pathen Chapa chu mona bei hijongle mona akipetai. Amahi Israelte lengpa aki hisah-e, tia themmo anachanu ahin, Pilate in Jesu henga, "Judahte lengpa nahim?" tia anadoth leh (Mt.27:11, Jn.18:20-37,Lk. 23:2) Jesun, nasei bang chu ahinai, anatin ahi. Jesun, "Kei lenggam thu hi hiche vannoi leiset-a ding thu ahipoi" tin jong ana seichene (John 18:36).

Pilate in Jesu hi Galilee mi ahi ti ahin hedoh in, Galilee mi chung a vaihomba Herod in Jesu chung thu akholna din ana soltai, ahinla Herod in amona aholdoh jou tapon Pilate henga ahinlesol tai. Hiche kah hin Pilate jinu hin, ajipan Jesu a-eng bol louna din, amangset dan thu ana lhut kit in, Pilate in Jesu aging cheh kit tai (Mt.27:19, Lk.23:5). Judahte thempu lenpen ho leh upaho dei dol in, Jesu chu cross a ana kikhai lih tai (Mt.27:22). Hikoma ase'n apha alep banga hi, tulai vannoi leiset hi jong apha sanga ase khangtou joh ahitai. Apha cross a akikhai banga leiset a thilpha bol ho paomo cheh cheh ding hitam tihi lunggimna ahitai. Hitiho lah-a ihin lai un, Jesu naicheh cheh ute.

Mi athisa thokitna

Jesun Martha henga, "Kei ma thokitna le hinna kahin, keima eitahsana chu thi jongle hing ding ahi" anati (John 11:25). Martha leh Mary insunga asopipa lhon Lazarus athi hi, amani dia thomhao umtah ahin, thohleh leh lhon inte (Jn.11:1-25). Bethany khoa amani toh kihe ho chun, lhamonna thu sei untin chu le neh le don ima ngaito peh tei inte. Jesun, Lazarus hingkit nante, tia ana sei hi Martha'n asoppha poi. Ama nun atahsan hi mithi chu vui ding, kho nung sanga thokit nikho teng thou doh ding, tichu anatahsan ahi. Ama nu het-a chu athi akihinsah kit um kha loulai anahi.

Lazarus chu thia akivui seh hilouva, nili lhankhuh a uma ahitai. Amonsah leh a-uisa hitei inte. Jesun hitobang jong chu ahinsah kit jeng thei ahidan, hiche thusima konin ihe uve. Jesu chu Lazarus sempa hinsah pa ahin, asemphat kit thei ahi. Ngai lut Pathenin angailu anung sun jipoi.

1. *Ngailut hin lungpi aken ahi* : Jesun Lazarus damlou thu ajah chun angailu lhez in ahi. Thina a hinkho kichai ahipon, thina in Pathen asuh loupai angai-e, tichu Jesun avetsah nom ahi (Jn.11:4). Jesu nung jui leh athusei ngainom tampi ana um jong le Pathen loupina vetsah din Lazarus umna lam ana jon tai.

2. *Ngailut in kichat ahepoi* : Asei jui hon, Jesu chu Judea lama ache leh mihon songa aselih thei ahina thu aseipeh vangin, Jesu chun Lazarus angailu behseh in, aumna lam jonin anache jenge (Jn.11:8). Mihem lung gela gin umtah lamjot ahi vangin lung setnaa dim Jesu chu Lazarus kaithou din anache jenge. Jesu akichat lou vang chun anung juiho chu kicha lhez unte.

3. *Ngailutnan kinepna asoi* : Ngai lut in, kinepna beite kinepna apei. Jesun Martha henga, "Nasopipa thoudoh kit ding ahi" anati (Jn.11:23). Bethany khoa cheng ho chu Lazarus ahinga mukit dia kinem lou ahuvun, ahinga amudoh kit uchu mai nah in kipah pouvinte. Hinkho thah kipapi tam unte. Mitlhi jouse kang soh tante. Jesuah hinkitna aume.

Chonse louhel Jesu

Chonse louhel van Pathen Chapa Jesu chu i-atile michonse ho khela leiset-a hungthi ahidem ! Isa. 54:4-12, John 19:1-16. Israelte ngajing Messiah ahina vetsah din chule leiset a mihem a ahung pen lona vetchen sah din, Jesun phong tah in Jerusalem khopi kicha louhel in ana jonlut in, Israelte Pathen hou dan dihlo aphoh in, hou-ina kiveina neiho anodoh in, chule atoh ding molsonan athitai.

1. *Athoh ding kiseisa* : Pakai Jesu lei-a ahung pen jouva athoh ding ho kisei masa ahitai (Isa.53:1-12). alestine gam sunga Qumran kiti muna leinoi-a ana kisel, Isaiiah them gao lekhabu vannoi gallen nina jou va kilaidoh-a, hia kisun Pakai Lha chapa (Jesu) thoh ding kiseisa hi Pakai Jesu thoh ding ho akima seina ahitai.

Isaiiah themgao lekhabu hi ginchat dola Pakai Jesu mihema a hung pen masang kum 500 vela ana kisun hitadin tahsan ahi. Kum 500 jouva hung penga, chonsete jouse dia athoh-a, athi ding masei thei a chu Pathen bou ahi. "Phat alhin set phat in, Pathenin achapa ahinsol lhan, danthu dung jui-in, numei sunga ahung peng in" kiti hi semtil a Pathen thilgon kisei satoh suhtoh thei tah ahi (Gal.4:4, Rev.13:8). Ajeh chu Pathenin, "Athoh ding hi kadei ahi ..." ati toh akitoh-e (Isa. 51:1-12). Phaten tahsan ute.

2. *Houdan dihlo athipi* : Pakai Jesun hou dihlo leh dan dihlo athipi anahi. Israel leng ho le hou lamkai ho chekhelna phoh thei ding leng jouse lengpa (Messiah) ahina jeh a, aphoa chu Israel lamkai jouse thangtom uva, mitsing kei-a thadoh ding anati ahitai. Gam vaipo Rome inpi mitvet-a athi thei ahina dinga Rome kumpipa deh-a ase i uva, kum pipa sanga lenjoa kisei ahidoh dana ahehset-u chule Israel dan dung jui a kipathen sah chu tha dinga kiloma ase i beu ahitai (John 19:7).

Pakai Jesu 'Pathen Chapa' a akisei aseidoh-u chun, Rome gam vaipo Pilate akicha cheh kit tan, lha doh tei ding agot jala thu ni ana sei, "Ven, Mihem hi" (Jn.19:5) atileh "Ven, nalengpau hi" (Jn.19:14) teni hin thugil cheh ni aseidoh tan ahi.

3. *Jesu thilona pen chu* : Palestine gamsunga gam vaipo ahijeh chun Pilate hin Pakai Jesu natoh, thil ki dang abol tampi anajah tei ding ahin, chule achung thu akholnaa ma, "Pathen Chapa" tia min aseidoh kit uleh athutana apan vanga akithana, naat lou ding adei in, Israelten akitha joh din ana pedoh tai (Jn.19:16).

Isaiiah themgao lekhabua ki sei masa bangin, Pakai Jesun tahsa tah in chonsete thoh ding jouse athoh in, athi tah tah ding kon chun na-asa behseh jengin, "Oging tah in apengin, 'Pa nakhut' a kalhagao ka pei' ati jouvin atantai (Lk.23:46).

Thinan mi atha hi, thohlel tin chang kikhonna ahitan, michonsete boldoh, alél helu thohna chu ahin, Pakai Jesu gei-in jong na asah beh seh-a pengjah jeng ahitai. (1) Chon sete thi khela athi hi, Pathen dei pel joulouva athina ahi. (2) Pelmo thinan eihin phah teng, Pathen khut-a kipeh lut aphaí. (3) Pathen dei ahi jeh-a lung lhaisela thi ding ahi.

Chonse mihemte dinga Pakai Jesun athipeh thuhi seiná dinga, anikho jeng jong 'Nikho Pha' sap paova 'Good Friday' tia kiminsah lo ahitai. Hiche nikho pha hi tuchan gei chule leiset khang kichai gei-a, vannoi namtin lah-a Pakai Jesun eithipeh nau, "Nikho Pha" hi kinit jing ding ahitai. Chonset thinaa kona eihuhdoh diuva eithipeh pau Pakai Jesu Christa hi tonsot atonsot in thangvah le vahchoi in umjing jeng taken, Amen. (Dr: T. Lunkim)

Thilsoh kidang ho

* Himachal Pradesh a class VIII sim numei chapang christian khat hi govt hostel a ana umin, lekha asim masang seh leh exam apeh kon seh in ogingin, Pathen koma taona ana mang jin, warden in atao louna dia apho ji vangin, akicha deh pon ahi. Exam. kiphon nin, ama hi school a athempen ahung hikhan, govt in kipaman Rs. 10,000/- anapei.

* Maharastra a kho khat a cheng hon akhouva christian ho akibelap

chéh chéh chu amuvín, akikhopnau akhah un, chule police in amatna diuvín ana héh ui. Church lamkaipu chu police in akouva adoh leh aman police ho henga chun Jesu thu ana lhangsam tan, amatlo tauvin, ahinla chomkhat jouvin Bail in ahin lhadoh tauve. Ajingín huise nasatah hiche khoa chun ahung langín, amatsah ho lamkai domho in jouse ana phelhai. Hijou kalse khomi hon christian ho chu akichauvin, akikhop-u asuphal ngam tapouvin, atahsan jong akibe jinge.

* Telangana a khoneo khat a Jesu tahsan thah hon mi khat ina 'fasting prayer' ana jan bolun ahile Pathen oilou nupi damlou akum 30 vel khat hi aina kon in atonau mun gei chun ahung kilihtó thon, ahung lut in adamdoh tan ahile Pathen aoilo tai. Khomi danghon ajadauvin, mi 150 vel hi pasal nin ahin lamkai in, christian ho chu akinah piuvín, taona abol louna diuvín ana gihsal ui. Mipi hin tildoh pasal ni chu hanat in ahung nalhon tan, christian ho chu ahin ki chat lo tauve.

* Gujarat a christian nungah khat anu chu adammon anathi. Amanu hi Jesu tahsan lou ahivang in achanu chu Jesu tahsan tah ahin, anu thilong koma abohkhup in hatah in Pathen henga ahinna din ana taove. Pathen oilou ahung kikhom hon, tot nopnan ana nei un, avuina ding angaito loina diuvín anahilui. Pung khat vel atao jouvin, kidang tah in anu chu ahung hingdoh kit in, Pathen ahouló tai.

Pathen Danthu het ding

Satan in Pakai Jesu chu dan thu hekhel ho leh thunei vaipo nom ho amatsah got dan melchih in aphaí (Exod. 12:21-28, John 11: 45-57). Gamthip noi-a Pakai Jesu satan in thumvei alhepna ah, (1) Danthu dola ahekhel ho leh (2) thunei vai hom nom ho atildoh, (3) apankhom sah a Pakai Jesu mat agot-u aume.

1. *Pharisee ho*, danthu hilkhel jeh a Pakai Jesun athilo ahi. Pharisee ho chun, ipi deinaa Pathenin Mose chu danthu apeh ham ti ana geltoh pouvin, adanthu a chu amoh jui got -u ahikhai. Pathenin danthu apeh lona chu, mihem thisa chohingna ding lampi hilnaa anei ahilam Pharisee hon ahe pouvin, danthu joh chu achinpha tho-uve. Amaho gei in ajui lou, danthu chu midang juisah din akihil uvin, amahon la ajui pouve.

2. *Sadducee ho thil-itan* : Ama ho hi hou mangchaa thunei vaipo ahivín, athunei nau le avaipoh nau chu Pakai Jesun alahpeh diu ginnaa Pakai Jesu hi atha nomu ahi. Israel gam sunga Rome kumpite vaipoa pang ahivín, Pakai Jesu chu mipin ajui jeng phat-a chu, Sadducee ho themmo chang diu, chule Rome kumpi ten amaho abol genthei diu ana hidoh ahitai. Rome kumpiten anganseu Sadducee hon mipi atin lel uva, mipin Jesu nung ajui soh leh, Rome kumpite hung lunghang doh a abol genthei diu sanga, Jesu joh

hi thadoh ding chu mipi huhhingna hidinga agelu chu, Pathenin chonse te huhhing dia ahinsolna toh kitoh kha ahi (John 12:50).

3. *Jesu kimatlona* : Danthu het khelna leh thunei vaipoh nomna in Pakai Jesu kimatlona asosah ahi. Gamthip a satan in Pakai Jesu dan thua alhep chu Jesun alekhup thei in, satanin danthu amanchah vangin ajou tapoi. Pharisee hon danthun ipi adoi helouva, akisei bang banga ahil jeh un Pakai Jesu themmo achansah un ahi. Thunei vaipoh deinaa, satan in Pakai Jesu lhep lhah agotna chu, Sadducee ho lungsunga akhumpéh a Pakai Jesu thadoh ding atiu chu, (i) Mipi thununna dia, Pakai Jesu chu mipin jui taleh Rome kumpite lunghanga mipi abol genthei dia aseí u, (ii) Adih tah chu, Pakai Jesu atha doh-u leh Sadducee ho chu Rome noi-a thunei vaipoa pang ding ahivue (iii) Mipi thilo sanga Jesu thatdoh leu phajo dia aseí-u, hichu mipin pha asah-u ahi.

Hijeh chun Pharisee ho leh Sadducee ho aitih-a kihou thei loute ni chu, danthu hilkhelna le vaipoh nomna kigoma kihou thei hidoh ahi.

4. *Jesu thilona* : Chonsete huhhing na dinga Pakai Jesu thi tei tei dinga Pathen gonsa ahin, athina dinga thu kiheidol ihet themu angai-e. Danthua jong mihem chonset jala Pakai Jesu thilo dia kisei chu danthu them hon asuhmil uva, atah dia apanlo bang uva, hou danthu them hon hetkhel abai-e. Hou natoh hi, Sadducee ho

banga thunei vaipohna thei-a gela hoithopi nan themmo eichan thei ahi dan hetthem apha. Hijeh hin Pathen danthu iti het a, adihna banga chepi thei ding ahina dia chih thei ding, let le lal nom jeh-a kupal lo lou ding, Pakai Jesu choi-at sanga suh minset loa, achainaa Damun joh jot louna dinga kineosah le nunnem angai lhez jenge. (Dr. T. Lunkim)

Houbunga pamchang ho

Pamchan sah hi houbung abol lou leh abol loi akiumin, hijeh chun itobang chonset chu pamchan sah thei ham tihi ngaito kham set ahi. Gucha michom, june loune, jonbol, kingai kijam, miji jonpi, tolthat, doi choi, milim hou, govt le haosa ho paidoh, hiho le adang dangho hinte. Hichengse hi pamchan sah thei cheh ahi.

Pamchang ho athi teng, ho bung in dan-a vuithei lou ding, kiti thei intem ! Masang houbung ho chonna vang athengin ahoi thei in, maipha vetna beihela Pathen lungdei joh kihola, Pathen mai vea anabol jiu ahin, hilai chun mi khat vet-a akoi tengu jongle mithi lhah-a anallah jiu ahi. Kum khat ahiloule lhagup tiho ahijin, Pastor ahiloule houbung in dan-a alhah lou ding, cross apud lou ding tiho anahi.

Tulai hin, hiti lom lomin ki mang tahih jongle mihem hinkho khat beini ahitan, houbung member khat kilhaso ahitan, Rev. le pastor hon lungmonna thu, tilkhouna thu ho

seipeh a, taopeh ding, lhaset sah lou ding tiho ahitai. Ahinla houbung in ahah ding chu, danthenga vuilou ding kiti leh cross putsah lou ding kiti vang hi kijom nalai le kadei-e.

Pamchansah, vet-a koi, kiti hi hoilai Bible to kitoh a pastor in alhah lou kiti lo hintem ? Mat. 16:19 a, “Keiman vana lenggam kot heh (chabi) kapeh ding, leiset a nakha chan vana jong kikhah ding, leiset a nahon chan vana jong kihong ding ahi” tin Jesun Peter henga anasei-e. John 20:23 a, “Nang hon mi chonset ho nangaidamu leh ngaidam chang diu, themmo nachan sah ule themmo changding ahiuve” tin Jesun aseijui te henga anasei-e. Mat. 22:14 a, “Akikou atam lhez nan, lhendoh vang lhomcha ahi” akiti. Mat. 22:13 a, “Jol, moupui golvah von bei-a iti hung lut nahim ? Akhut akeng kan unlang, polam muthim lah-a paidoh un” tin lengpan anasei-e. Mat. 7:21 a, “Pakai, Pakai eiti chan chu vana lenggam lut lou ding, vana um kapa deilam bola bou lut ding ahi” tin Jesun ana sei-e.

Thini, lhaset ni kaani ahin, ahivangin, thinung kilungset vang pan na bei ahi. Hinpet dampet hi kilung set phat ahijoi. Mi khat chu adam pet’a lungset louva, athi nia hakaa kaa chu amanla jata lou ding, ipi panna hintem ? Nangailut khat athi nia nakisih louna din, tu hinkhom pet hi kilungset phat ahijoi. Michonse athini leh Damuna kitunga dangchah

a, peng peng taa, a-inkoten athi nunga cross semding, pastor in alhah ding, tia kisahel hi aphachom nadem ! Alhagao joh ana khohsah louva, khonunga a-cross boipi chu ipi tina ham ? Cross hi hinpet dam pet-a kiput ding ahin, thinunga put ding ahipoi.

Van gam lut hi iti hah hi tam ? “Mihao van gama alut sang in heubil homa sangong sao lut abai joi” (Mat. 19:24). Seijuiten “Achuti leh koi huhhinga umjou ding ham ?” tin Jesu anadong ui. Jesun, “Mihem bol dia vang hithei louhel ahin, Pathen din ijakai ahitheh soh kei-e” tin adonbut tai (Mat. 19:25-26). Hijeh chun Jesu neiho, Christa dia peng thah ho din van gam lut chu baitah ahi. Ajeh chu huhhingna neisa ahi.

Kei ngaito thina - Thina hi kangaito tole lunghel aumta ngei jenge. Ahile ibola thina hi umkhoh khoh ham ? Ingaitah in eithisan hela, leiset-a kimuto kit talou hel ding chu lunghel um lou ham ? (i) Ahinla, ithi lou leh van gam kilhung kit lou ding ahin, van gam lhun teina dia chu, thi tei-tei ngai-a ahi. Michonphate thini hi, kipani, nopni, loupni ni ahin, chule tonsot gama lhunni jong ahi. (ii) Van gama mitcho aum tapon, kengbai jong aum tapoi. Lunghel lhaset, kana jong aum tapoi. Mi hoi mo jong aum tapon, gilkel dangchah aum tapoi. Chung gama lengpa chu eihuhhing pau le Pakai, genthei mol so cheng toh achengun, chua chun ahsi bangin a-emsel jing un, chung

sana khopi chu nomtah ahi.

(iii) Michonsete thi vang hi, ohe ada ahiuve ! Damun Meidila atonsot atonsot-a mei-in akah diu, thila thilou diu, genthei thoh-a kale pen gin in ki chaitih neita lou ding ahitai.

Hijeh chun, huhhinga naum na dingin na Pakai-in tuni hin jong nakou nalai in, nangah jenge. Calvary lhang cross chung na-ngah ngah jenge. “Hin sumil ponge, Pakai Jesu, Calvary lam hinve jing nange. Ka dinga nathohna kalung sunga, kalai cha gei-in hejing nange” ti lahi ki geldoh in. Asim jouse huhhing chang cheh uvin, Amen. (Rev. Seikholen)

Damna thei ho

* Thei neh damna ahi, tin akisei-e. Ahinla thei hi itih phat-a akineh leh pham, ti jong het ngai ahi. Iti akineh leh kidam thei ham, ti jong hettha angai-e. Tulai hin mot, haithei, gobi, ankam-na kitiho jong lou tha hat-a kihoi sah, kimin sah bazar a akijoh in ahitai. Lou killah khum pou-pou hi tahsa din aphapoi. Eima hona kitua neh hi damna vang ahi pene. Mot le hai ho aminna kimu phabep khu louva kiminsah ahi. Louvin jan khat kah-a aminsah thei ahin, lou-a minho mindan phaten veleu chun amindan kitoh lou, aminlai aminlou lai kihal ahi. Ankamna le gobi na ho jong louvin alim ahoisah in ahoisel in, ikihona ineh teng anam khat anei jin ahi. Tulai a lou jatchom chom so lai hin, neh le chah ho lama chingthei

ute. Nga jong hi nikho tamtah garia ahin poh hou, nikho tamtah joh thei dia angaito houva khun, eihon mi khat athi tengle amon louna dia lou kikap ho khu akap khum jiule tem in amon jipon, ahelou hon vang aki choh un kipah tah in ane jiuve. Nga thisa kichoh a nehrou vang phajo ahitai.

Akine akidon jouse ginmo aumlai hin, chingthei tah-a neh ding chah ding ho kichohji ngai ahitai. Lou kilhah khum ho neh-a, hiche ho jeh-a idammo tengle pharmacy a lou kichoh-a idamna dia kijan kit jeh hin, tulai hin thajung nat vei itam cheh cheh tauve.

Hai-a kikhumsa theitui, don thei thil ho jong hi chini atamjao behseh jeng tan, mihem din ha-nat na leh oisung damlouna atamsah-e. Thei hi dukana semsa kichoh sangin eiman ikisem leh chini apang pon akidam joi. Thei hi oikeu pet, anneh masanga akineh le apha. An neh jou tila thei nehrou hel ding ahi. Ajeh chu anneh jouva akineh loi-a ahile inehsa ho chu *acid* asosah jin aki dam thei poi (to eat empty stomach or, before meals). Hiche thei kaneh le ka-oi adampoi, mot kaneh leh ka oi alhai-e, tia seiho chun oiva jouva aneh jeh ahi jie. Aneh phat louva, thei nejing ho a-oi adamlou chung, asamu akang bai-in, asam apulin, amit noi-u avomin, ahinome. Aneh phat-a thei nehje heho chu, amelu hoi intin, hinkho sot intin, tha nei-in tin, thao behseh ponte.

Science leh Pathen

University professor pa khat in, student ho henga, “Thil na mu hou jouse hi Pathen sem ham?” tia adoh leh student khat in, “Ahinai” ahinti. Professor pa’n, “Pathenin thil jouse asem mong ham?” ati kit leh hiche student pa chun, “Aseme” tin ahin sei kit-e. Professor pan, “Chutia ima jouse Pathen sem ahileh ase ki ti jouse jong Pathen sem ahi” tin ana sei tai. Hichu ajah phat in student pa chu athip delta. Student pa chun, “Ojapu, adap (cold) kiti hi um em?” atile ojapun, “Ipi hiche ho chu ki dong ding ham, adap kiti hi uma chu mem!” ahinti. Chuin student pa chun, “Ojapu, adap kiti hi aumpoi. Physics sei dung jui-a asa umlouna adap uma ahijoi. Adap kiti thucheng hi mihem semdoh ahi, hichu asa ihet lou tengule itahsauvin ipi ahedoh ji em, ti hetna ahibouve” ahinti tai.

Student pa chun aseibe kit in, “Ojapu, muthim kiti hi umem?” atile professor pu chun, “Umhah di ham!” ahinti. Student pa chun, “Ojapu, nasei khelkit taleuve. Muthim jong hi aumpoi. Eihon muthim ituihi, khovah kiti beina chu ahibouve. Muthim ichana sao ham ti jong akihol doh joupoi. Vah kiti hi ipi ham ti aki khol toh thei in, muthim vang khol doh thei jat ahipoi. Newton in Prism (hai jat khat) a konin vah hi ajem sagi vel nei in amui. Jem khat khat chu ichan chana kikhodoh a vah ham tijong amu doh thei-e” atipeh tai.

Chuin aman professor pu henga, “Ojapu, ase (migilou mise) kiti hi umem?” tin ana dong kit in ahile ojapu chun. “Aume. Migilou miphalou, lungthim se tampi imu jingui,” ahinti kit leuvin, student pa chun, “Ojapu, hi jong chu nasei khel tai. Ase kiti hi aumpon, ase hi ama changin aumpoi. Ase hi Pathen um louna hetna ahijoi. Adap kiti leh muthim kiti hi ase kiti toh akimin sah dan akibange. Ase kiti thucheng hi Pathen beina mun hetna dia mihem in aminvo ahi. Pathenin ase ana sem poi. Ase kiti hi tahsan itui leh ngailut itui hou tobang ahipoi. Ngailut leh tahsan kiti hi asa (heat) leh vah (light) tobang ahi. Mihem lungsunga Pa then ngailutna achen lou tengle ase kiti hi kondoh jia ahijoi. Asa um lou na muna adap kihedoh tobang ahi. Chuti bangma chun, vah um louna muthim akihe doh jie” anati leh oja pu chun sei ding aheta, atou thip doh tai. Chuti chun kho nungin, hiche student hi, lekha them, lhoh phapa Albert Einstein ahi, ahung kihe tai.

Nuitem in, nadamna din

* Nupi khat in ajipa henga, “Janhi chun numei hoitah khat kamui” ati leh ajipan, “Abanla” anati. Ajinun, “Amanu chu kaven, ahoidan chu kidang kanasai” ati. Ajipan, “Chu jouva i-nati hitam?” atile ajinu chun, “Chujouvin, kajah achan, phatvet (aina) a kalim kanavet vetnaa konin kakihei mang doh tai” atileh ajipan seihe ding aheta.

* Hotel a chadon pan, achakhonna thousi khat amun chahompa henga, “Ven, ven, hiche hi ipi tina ham?” atin ahile chahompa chun, “Hepu, kei hi thil domle khat kahin, miho vang vepa kahipoi, hijeh chun ipi tina ahi kahepoi” anati.

* Dentist (Hasempa) khat in mi khat ha asemtoh peh jouvin, “Napot ma sangin, naha kasem pet-a kaleh pen nakop danin, hapenin pengin chule hakan hung kap in, chutile sum lata ponge” ati. Ha kisemsa hpa chun, “Idia hitia chu kapen ding ham?” atileh doctor pa chun, “Aha kisem nom mi eingah atam valin, kenla ni lhah-a cricket kichep aphatcha ina kalhuna kavet ding kadei ahi” tin ana donbut-e.

* Office a natongpa khat in atoh khompi pa henga, “Nikhat in, hiche ileiset uhi somthum vei-vei kipei lhung keiji hen lang hile itin tem?” tia adoh leh aloipa chun, “Kahepo, nang in hinsei tem” ahinti. Amapan, “Ileiset uhi nikhat sunga vei 30 akipei jia ahileh niseh in lha tolop kisang jenginte” tin ana sei-e.

* Pasal khat in Lawyer (Ukil) pa henga, “Keidin case khat court a nei boipin” atile ukilpa chun, “Ijat nei peh ding ham?” ati. Amapan, “Pu, keima mivaicha kahin, ahinla gari Car khat vang kanei-e” ati. Ukil pan, “Achutile phajeng achula, na Car chu najoh-a sum neipeh le ahi jenge, akhoh poi. Tun na Case thu chu sei temin” atile amapan, “Ka Car nei sun min eiguhpeh thu ahi” anati.

Het-a phachom ho

* Hapta khat a Apple pum nga nga ne jou ho chop (lungs) adamjep ji tei-e.

* Andaman & Nicobar Islands ah Cellular Jail (Kala Pani) tia kihe jail khat Gallen Ni lai chun anaumin, hia chun British ten aginmo India mi (Kuki chate mihang le mihat ho jong) hiche songkula hin ana khum uvin, genthei tah-a indan a akoi-u ahi jeh chun mi atamjo anathi. Tun jong mi amun venom ho ache jingun ahi. Hiche songkul hi asan lama indan thum nei ahin, inbah sagi nei ahi (7 wings, 3 stories). Asunga indan 693 um ahi. Asunga kikhum ho chu khat le khat kihoumat theilouna dia indan neocha cha, khat le khat kimuto theilou a kitem anahi.

* China a changlei asao dan meter 450, chule tolla kona asandan meter 300 khat mol ni kikhah-a ana kitem in, August, 2016 chun ana kithenson ahi. Mihon kenga ajotna diu lei khun peh chu hai (glass) a kitem ahin, achunga chehon noilam peh-a tol chu avettha peh jiuva lei chu apal galkai jiu ahin, kichat umtah ahi. Mi 8000 bou in nikhat a lei chu apal thei dia ana kitem ahin, mi 10,000 cheng in pal galkai agot jing jeh un, hapta ni jouvin lei chu akhah doh tauve.

* August 5, 2011 a NASA in van a lengle eiho leiset tobang Jupiter kiti umna mun jona, 'Juno' tia kiminsah satellite khat anasolu chu kum 5 jou vin July 5, 2016 chun Jupiter kom

11

alhung tai. Jupiter hi vei 37 avelkol ding hiche kah a chu Hydrogen le Oxigen Jupiter a ija ja uma ham tiho akholtoh jouva, Jupiter koma leng lut-a, mei-in akahvam ding ahitai.

* Dumchep meikhua mihem thina thei agu (poison) jat 18 aume. Mei khu phalou hi mihem haina huilong hubit in apangin, hai akisuh sah pon chule mihem chop a alut in aneheng in, chukitle mihem thisana jong alut -e. Hijeh chun dumchep hat ho Cancer veilona, hainop louna asosah jie. Dumchep mei khu jong acheplou khat in akijoplut tengle ama dia jong phalou ahi. Dumchep (churup, Biri chep) tahsa din aphapoi.

* Germany gama mi 800 chenna khoneo khat a, hou-in akai pettah un, thousi jat khat ahon-ajangin ana lenglut in, miho sam a abeh chel chul in, hou-in maicham phunga thil jouse akhu khumun, tunging ho jouse jong atomun, hou-in kaithei louvin ana lha tauve. Hitobang thilsoh hi amaho khovel hoa jong asoh khapo lai-e atiuve.

* Numei anao-an (a-aang) neo ki sa hon, aletna din, operation akibol jiuvin, avun sunga semthu thil (gel) akoisah jiuvin ahi. Hichu sappaoivin 'breast implant' akiti. Ahinla, vet-hoi chom jongleh adep ahah in, sum lut na tah jong ahin, chule aphot phat-a khelji ji jong ngai in akisei-e. Chule ahung dammo thim tengle sunglama pohkeh khattou ham tia MRI Exam. bolji angai-e. Hiche jeh hin Breast Implant hi bollouva phajo ahi.

12

Christian Meivah - sim te taona akiman peh jinge. Sumto kuma Rs. 100/- ahin, asim nom hon hin peuvin, sum napeh lhaa kona kum nakisim peh ahi. M.O. hin thot hon Editor kipe ding lekha beh a namin le address suntei un. Editor pu Mobile No.94355-51080 ah hin hetsah un. Manipur le Nagaland a sumto peh na thei ho :-

- 1) Mrs. Neijathem Haokip, Haokip Veng
- 2) Ms. Lhingjanem Haokip, KBC
- 3) Mr. Douzahan Guite, Dewlah Land
- 4) Mr. J. Manchong (Lunpu), KCC
- 5) Rev. Lhoukholal, Kangpokpi Missn
- 6) Mrs. Veikholam, Ideal school, ccpur.
- 7) Rev. Seikholen, Medziphema, Nagld.
- 8) Mr. Seikholun Singsit, Kohima.
- 9) Mr. Kapcha Singsit, Dimapur.

Het-a phachom ho

* 2017 kuma hi :

- Palm Sunday ... April 9
- Good Friday ... April 14
- Pentecost ... June 4
- Mother's Day ... May 14
- Father's Day ... June 18

* Kuki Worship Service, Guwahati, March, 2017 a kona Sunday jingkah 11 a.m. kaikhom phat ahi tai.

* Syria, Iraq, Iran, Nigeria, Pakistan, China, le India a, Pathen oiho suhgenthei ahi jing un, tao peh ute. Hou-in kai pet a kibulu, kikap thu akijan, hijeh hin hou-in neihon, kot ni thum beh sem ngai ahi. Abulu tengu jamdohna ding kot angai-e. Tulai hin ginchat lou lou asoh tai.

Christian Meivah
March - April, 2017

PRINTED MATTER

To :